

КАНОН ПРЕСВЯТЕЙ БОГОРОДИЦЕ ПРЕД ЕЯ ИКОНОЙ ИВЕРСКАЯ

Тропарь, глас 1-й

Дёрзость ненавидящих образ Господень и держава нечестивых безбожно в Никее прииде, и посланнии безчеловечно вдовицу, благочестно чтущую икону Богоматери, истязуют, но тая нощию с сыном икону в море пусты, вопиющи: слава Тебе, Чистая, яко непроходимое море плещи своя подаде, слава православию Твоему, Еди́на Нетленная.

КАНОН, глас 8-й

Песнь 1

Ирмос: Колесницегонителя фараона погрузи, чудотвори иногда Моисейский жезл, крестообразно поразив и разделив море, Израиля же беглеца, пешеходца спасе, песнь Божии воспевающа.

Припев: Пресвятая Богородице, спаси нас.

От скверных устен хваление прими, Всенепорочная, якоже прежде Сын Твой, Бог же мой и Господь, прият две лепты вдовицы, и разрешение прегрешений моих подаждь, яко да по долгу величаю Тя.

Пресвятая Богородице, спаси нас.

Ангельское пение подобаше Тебе, Матери Божией, Творца бо сих родила еси странно. Но и от нас прими, Владычице, смиренные сия молитвы, да поем Господеви: славно прославися в нашей немощи.

Слава: Огустеша воды, огустеша и волны посреде моря, носяща Твою, Богомати, икону. Утверди и мое подвигшееся сердце на камени заповедей Христовых.

И ныне: Помощница и Покровительница была еси, Дево, обители Иверския, воев Амиры с кораблей их в море погрузивши, но потопи в пучине милосердия Сына Твоего вся моя душевные страсти и безчисленная моя прегрешения.

Песнь 3

Ирмос: Утверждей в начале Небеса разумом и землю на водах основавый, на камени мя, Христе, заповедей Твоих утверди, яко несть свят, паче Тебе, Еди́не Человеколюбче.

Пресвятая Богородице, спаси нас.

Утверди сердце мое во уповании на Тя, Богомати, изми всякую гордыню и превозношение из помраченного ума моего, да вопию: несть свят, яко Господь, и несть праведен, яко Бог наш.

Пресвятая Богородице, спаси нас.

Ты, о Богомати, немощствующия препоясуеши силою, алчущия насыщаеши; посети и мою немощь и алчущаго и жаждущаго мене насыти Животнаго Хлеба, чрез Твою девственную утробу спешаго с Небес на землю.

Слава: Возстави, Владычице, от земли мене, убогаго, и от гнобища греховнаго воздвигни, нищаго, даждь молитву мне, молящемуся да, величая, пою Твое заступление.

И ныне: Неплодствующий мой ум плодоносен покажи, Благая Дево, от неплодове рождаемая: Ты бо плодоносие всех благ явлением иконы Твоея подаеши.

Господи, помилуй (трижды). Слава, и ныне:

Седален

Светлое днесь Заступницы нашей настает торжество. Да възграется тварь, да ликовствуют человечести соборы, созывает бо нас Святая Богородица видети огненосную икону Свою лучами милости верных просвещающую. Темже, радуясь, вопием: спаси, Господи, от глады, огня, меча и бед вся почитающия явление иконы Твоея.

Песнь 4

Ирмос: Ты моя крепость, Господи, Ты моя и сила, Ты мой Бог, Ты мое радование, не оставль недра Отца и нашу нищету посети. Тем с пророком Аввакумом зову Ти: силе Твоей слава, Человеколюбче.

Пресвятая Богородице, спаси нас.

Покры Небеса добродетель Твоя, Богомати, и хвалы Твоея исполнися земля, но положи любовь державную крепости Твоея и на мне, отчаянном.

Пресвятая Богородице, спаси нас.

Уготовляючи шествие, чудней иконе Твоей, даде бездна глас свой, воздвигеся солнце, и сияние ея яко свет бысть, но Ты изшла еси на спасение людей, спасти Твое наследие пришла еси.

Слава: Услышавше слух пришествия Твоего, иноцы убоишася; уразумевше же дела Твоя, ужасошася, но внемда смутитися души моей, милость Твою помяни, Владычице, да взываю: слава заступлению Твоему, Богомати.

И ныне: Ты еси моя крепость и сила, Богородице, Тобою почию в день скорби моея, и из страны пришествия взыду Тобою в Небесное наследие, и возрадуюся о Господе и Боже, Спасе моем.

Песнь 5

Ирмос: Вскую мя отринул еси от лица Твоего, Свете Незаходимый, и покрыла мя есть чуждая тьма, окаяннаго, но обрати мя и к свету заповедей Твоих пути моя направи, молюся.

Пресвятая Богородице, спаси нас.

Виждь, Чистая, от ноши утренюющая люди паствы Твоея, икону Твою Богохвальную обстоящая, разрешения же грехов просящая, и жития исправления, и Божественныя славы причастия: не отрини убо нас от лица Твоего, Света Незаходимаго Мати.

Пресвятая Богородице, спаси нас.

Всею душею и мыслию в пастве Твоея вси сликующе, псалмы, и песньми духовными, и пением Божественным икону Твою почитают, прощения грехов просяще и душ спасения. Ты же, исцеление наше сущи, сия вся подаждь, Владычице Богоневесто.

Слава: Храм Твой, Дево, яко рай другой показася ныне, яко древо жизни имея икону красоты Твоея, юже вси усердно со благоговением и любовью целующе, взываем: Владычице, мир даждь нам, Владычице, стяжи нас, иного бо разве Тебе утешения не вемы.

И ныне: Реку Тя сладкую и поток насыщения, манну Небесную, изобилие и благодать приснотекущую во обители Твоей живущии стяжавше, поют Рождество Твое, Отроковице.

Песнь 6

Ирмос: Очисти мя, Спасе, многа бо беззакония моя, и из глубины зол возведи, молюся, к Тебе бо возопих, и услыши мя, Боже спасения моего

Пресвятая Богородице, спаси нас.

В скорби сердца вопию ти, Владычице, житейскаго моря потопляем бурею, к Тебе, яко тихому пристанищу, прибегаю: возведи от тли живот мой.

Пресвятая Богородице, спаси нас.

Бездна последняя грехов обиде мя, и исчезает дух мой, но простри, Владычице, высокую Твою мьшцу и, яко Гавриила, и мене, ко Твоей иконе прибегающая, невредима сотвори.

Слава: Не отрини мене до конца от лица Твоего, Мати Незаходимаго Света, не попусти мне погрязнути в пучине беззаконий, но возведи мене от блата страстей, да взыдет из истления живот мой и пожру Тебе со гласом хваления и исповедания.

И ныне: Храм носяй телесный весь осквернен, Тебе, Пречистому храму Вечнаго Слова, дерзаю в честном храме Твоем, пред Твоею святою иконою приносить смиренные моя молитвы. Ты же, яко Милостивая, очисти мя Твоим благоутробием.

Господи, помилуй (*трижды*). Слава, и ныне:

Кондак, глас 8-й

Аще и в море ввержена бысть святая икона Твоя, Богородице, от вдовицы, не могущия спасти сию от врагов, но явилася есть хранительница Афона и вратарница обители Иверския, враги устрашающая и в православней Российской стране чтущия Тя от всех бед и напастей избавляющая.

Икос

В столпе огненне явльшуюся Богоматере икону видевше, возопиша постников иверских лица: о Владыко, сподоби нас прияти икону Матере Твоея во утешение странствия нашего; ты же, Гаврииле, дерзая и вниди в море, и прими во объятия твоя сокровище, нам являемое, да будет нам страж неусыпный, покров же, и радость всем христианом, и хранительница, от бед и напастей избавляющая.

Песнь 7

Ирмос: Божия снизхождѣния огонь устыдѣся в Вавилоне иногда. Сего ради отроцы в пещи, радованною ногою, яко во цветнице ликующе, пояху: благословен еси, Боже отец наших.

Пресвятая Богородице, спаси нас.

Согрешихом, беззаконновахом, неправдовахом пред Господем, но, Владычице моя Богородице, яко Благая угаси огонь Его праведнаго гнева Твоим теплым ходатайством, да поем Ему: отец наших Боже, благословен еси.

Пресвятая Богородице, спаси нас.

В пещи искушений и бед опаляемая ороси, Богомати, струями Твоих щедрот, да посрамится врази наши и да разумеют вси, яко Ты едина еси Владычица Богородица, по всей вселенной славимая.

Слава: Престолу Царя Славы, Честнейшая Херувим, одушевленный храм, в немже вселися Господь, твердь Небесная, на нейже возсия Солнце Правды, Христос, Тя поем, Богомати, и превозносим во вся веки.

И ныне: Ты еси веселие и в пустынях живущим, Ты еси и стольнаго града утешение и похвала, Дево Марие, препетая и превозносимая во веки.

Песнь 8

Ирмос: Седмерицею пещь халдейский мучитель Богочестивым неистовно разжже, силою же лучшею спасены, сия виде, Творцу и Избавителю вопиаше: отроцы, благословите, священницы, воспойте, людие, превозносите во вся веки.

Пресвятая Богородице, спаси нас.

Поют Тя Ангельския Силы, превозносит человеческий род, благословит Тя вся тварь, Пречистая Дево Богородице. Примими и от мене, недостойнаго, приносимое Тебе хваление.

Пресвятая Богородице, спаси нас.

Пойте, иноцы Афона, благословляй, земле Иверская, превозноси, вся страну Российская, Благую Владычицу, реки чудес от Своея чудотворныя иконы источающую. Хвалим, благословим, поклоняемся Ти, Богородице, поюще и превозносяще во вся веки.

Слава: Подобием иконы Иверския не точию святыи Афон просвещается, но и стольный град Москва украшается, от того чудесную помощь приемля и источник утешения в нем обретая.

И ныне: Еще и страна Новгородская и инии грады и веси подобием Иверския иконы Твоея, Владычице, освятишася и чудесы просветишася, вопиюще: Господа пойте и превозносите во вся веки.

Песнь 9

Ирмос: Ужасеся о сем Небо и земли удивишася концы, яко Бог явися человеком плотски и чрево Твое бысть пространнейшее Небес. Тем Тя, Богородицу, Ангелов и человек чиновачалия величают.

Пресвятая Богородице, спаси нас.

Тайна глубины Рождества Твоего ум Ангельский ужасает, Дево, и пречистая икона Твоя демоны прогоняет, не терпяще бо взирати на силу ея, бегают и

исчезают. Мы же той любезно покланяемся и облобызаем и Тя, Богородицу, величаем.

Пресвятая Богородице, спаси нас.

Приидите все, поклонимся, припадём и возвеличим Божию Матерь, призревшую на нас, смиренных, алчущия исполняющую благ и положившую с нами завет милости во явлении Своей дивныя иконы.

Слава: Богородице Дево, упование христианом, пробави и нашему роду милости Твоя, бывшия отцем нашим, покрый и соблюди нас от всякаго зла.

И ныне: О Всемилостивая христианом Помощнице, не может Тя воспети достойно язык человеческий и Ангельский, яко всея твари честнейшую и земных славнейшую, но прими милостивно сие приносимое Тебе от нас моление и спасай нас всегда, на Тя бо упование возложихом.